

雲南府志

中國地方志集成

乾隆石屏州志

乾隆石屏州續志

民國石屏縣志(一)

鄧平知

PDG

中國地方志集成

雲南府縣志輯 ⑤1

乾隆石屏州志


乾隆石屏州續志

民國石屏縣志(一)

鳳凰出版社 ● 上海書店 ● 巴蜀書社

乾隆石屏州志

(清) 管學宣 纂修



五九）刻本影印。

本書八卷，據清乾隆二十四年（一七

重修石屏州志叙

余守麗江曾修志矣時以麗處邊末改流未久土習漆錮文無可攷獻無可徵惻然憂之值石屏萬君咸燕以名進士鐸於麗者歷十八年本富孳心胸廣搜

羅耳目朝夕記聞迄已成帙請質於余余披閱十晝夜釐其次序增所記憶訂為十畧略云初瓶未備待後之君子云爾萬君欣然喜揖余而言曰以燕草創討論得公脩飾潤色幾稱

合璧矣余謝不敢當適萬君以卓異擢蜀之井研別去拳拳以付梓成書丐余肩其任余以治暇得從容就正於制府張廣寧督學孫端人同學劉紫溪均強以為善廼捐俸付門人孝

廉呈貢孫蒙山大理楊松舟竣其事踰時而刻成今麗江志略是也嗣終養告歸再出守楚之常德罹罪降調

君恩深重得刺石屏萬君從井研歿已十餘載悽然情愴

謂將有所作誰予將伯耶
屏較嚴為難治又漸次政
多廢弛懼厲吾民辜
上恩政教勤劬不敢或違
伏念屏為迤東文獻名區
攷舊志始於前明萬年
州牧太和蕭君廷對為予

鄉前輩繼修於顧公慶恩

迨

本朝鼎興江夏程石門稱彼
時名宿奉令修輯肯康熙
十二年也嗣經張公毓瑞
另續一卷繙閱之下殊苦
錯雜自是又數十餘稔幾

湮沒無攷矣予又憂之幸
獲前翰林侍御鴻博張月
槎先生所藏手編逸志繼
又得中翰許自文出其先
太史許秀山於康熙壬辰
年同前牧胡公承禧所纂
志本因恭而考之掇藻則

月槎為文紀事則秀山為
質質之不可少文猶文之
不可無質也乃合而訂之
去浮就實存樸得華日積
月累手自繕輯其為許張
兩先生所未及者又廣為
採訪細意補綴爰付門人

澱江刀衛坪上蘇光豸分
門別類逐條叅詳懼余之
老耄荒踈有所不逮不敢
自是也書成而舊恙漸作
思歸念切不及呈政

憲府及當代名公平生益
友貿付剗剗固知迂鄙之

識不足以黼黻休明追踪
前哲又擅妄僭竊無所逃
罪然而一片愚誠於去偽
求真信今傳後之意黽皇
不懈則固上下可共質也
若前麗志取諸萬而略今
屏志取諸張取諸許而詳

三君子皆屏名公巨手也
詳略之間余有心而無力
焉余於屏具有文章夙緣
哉是為叙
皆

大清乾隆二十四年歲在巳卯
盛夏月

誥授中憲大夫知雲南臨安府
石屏州事加一級紀錄十
次安成管學宣未亭氏撰
石屏州舉人任聚仁書



石坪志跋

乾隆十八年春吾

師未亭管夫子奉

簡命來牧屏始至之日緝閱舊志病
其闕而不核蕪而不當版籍且
漫滅不可復識蓋自康熙十二

石屏州志

跋一

年江夏程石門纂輯後閱今數紀
無人起而任脩明之責不可謂非州
之憾事也

夫子因慨然有重修之志爰稽於衆獲
侍御月槎張公手編太史秀山許公
藏本二公皆州人具史氏才選言識

事皆信而可徵者迺合舊志而崇焉

公餘之暇手自丹鉛刪繁芟稗崇寔

黜浮繼又旁蒐廣羅悉心讎校積寒

暑而書成乃捐俸付梓昭示來茲若

受而讀之質立文行炳炳如也綱舉

目張井井如也茂矣美矣斐然登作

石屏州志

跋二

者之堂矣說者僉謂夫子之為此克
舉其大而不知此特夫子治屏之一
端耳烏足以盡夫子哉若追隨夫子
又嘗綜夫子在屏之善政善教卓
可紀者指不勝屈也自昔雍正壬子
逆苗蠢動屏事孔棘大吏檄夫子精

軍事夫子手捍危城立誅謀者數輩
民獲安堵是夫子先於屏為奔走禦
侮之勞臣也及重來為刺史甫下車
適值承追吳尚賢欠項四萬二千兩有
奇前署收逮繫者百餘人夫子赴禁
所垂問惻然憫焉悉與保釋次第區

畫不震不疎又廉其赤貧無力者捐
已橐四百餘金盡償其欠卒之公帑
清而民有更生之樂大吏嘉之是夫
子於屏為惠鮮懷保之父母也二三
十年來屏俗不競時有健訟王教李
阿六及某某輩糾結毆蟠碎不可解

夫子杜苞直絕請託力為廓清批卻
導窳俾十數年來積案悉予結通
來訟獄稀少秀民斂跡良民樂業是
夫子於屏為勝殘去暴之神君也至
若開濬異龍湖以洩積淤添造流
沙橋以疏驟漲現今濱湖膏腴之田

悉逢有秋又清釐前吏目岳芳葉君
所置海口官舍並填長田二十一石
極意表章力加保護俾覬覦之豪強
不得侵併仁人用心其利溥哉他如
龍泉書院之建置歲修田以講學也
明倫堂之修視前加壯以敷教也先

農壇白龍祠之葺以祈年也十公祠
賓賓館之新以崇先哲振士氣也
若海東寶秀黃栗哨各處公廨
及地震搖損四城樓薰崩塌城
垣四十餘丈並化龍橋孔道塘房
一一鼎新之繕葺之輸之與之咏

之榜之約所費殊不貲皆舊衣菲
食節廉俸而為之者秋毫不以擾
諸民修廢舉墜如夫子可謂顧力
堅定者矣於戲士大夫學古入官非
徒託空言也掾水蘄者廉矣患在
乏振勸理盤錯者才矣患在賤清素

兼斯二者難矣患在水終譽過此
以往雖古之循良茂以加焉夫子
既兼二美復不狃既效以急成不
替初服以移鄙人之難夫子之易
也曾是州志之修謂可以盡夫子
哉然則州志之脩亦夫子治屏之

成事也云爾書付梓夫子將引年
以退若懼其政教之久而或湮謹
撮其大者附跋以傳非阿好無溢
美後之君子讀其書以想見其人
知必有慨焉以興者事夫子之
事學夫子之學是則屏之幸

而夫子之志也謹跋

乾隆二十四年歲在己卯孟秋月

上浣受業門人古晟孫似若
鶴齋頓首跋



序

屏處滇隅而華峰西峙異
水東環文物衣冠與中州
等埒顧山川亘古常新而
人物與時更易凡政教因
革與夫碩德芳踪可以信
今而傳後者惟志乘為足

徵按州志始於恭和蕭公
修於吳江顧公至

本朝康熙年間江夏程公修
於癸丑江陵張公續于己
卯距今六十餘年其事蹟
缺焉未備也母亦守土者
皆視簿書為急而以志乘

為可緩耶未亭管公以江
右名進士游宦四十餘年
其識愈廣學愈邃文章經
濟兼擅其長雍正壬子土
寇猖獗誼器之聲譟於城
下公奉委督理軍務晝夜
防禦得保無虞闔城咸慶
更生乾隆癸酉再任司牧
不為水懦不為火烈勤々
懇々惟以正人心厚風俗
為急務而於利所當興弊
所當除者無不次第經畫
釐然備舉既乃以志乘久
缺恐將來之文獻無徵也

爰取鄉前輩侍講許公暨
侍御張公所編輯者綜核
而銓次之復廣搜博採益
所不逮事雖出於周諮義
實本於獨斷閱數月而書
成而于徵發期會不少稽
遲也夫志猶史也煩則有
駢枝附贅之譏畧則有挂
一漏萬之弊所貴乎事增
於前文省於舊也今是編
義例謹嚴體裁明備詳而
不複約而能該一展卷而
屏之風土人物瞭然在目
矣豈非其才其學其識有

以擅史氏之長乎予屏人也稔知屏之利病在湖口屏之缺陷惟志書公一時兼任其事而且建書院置膏火以培養人才於無替是公之德及於屏者為不朽則屏之人其所以戴公

者亦將與之不朽矣寧僅與賢司牧後先輝映哉備書之以慶屏之遭且以慶公之遭也

大清乾隆己卯孟秋月吉

賜進士出身通議大夫宗人府府丞治年家弟羅鳳彩頓

首題



重修雲南臨安府石屏州志姓氏

纂修

臨安府石屏州知州曾學宜

參訂

臨安府石屏州儒學學正楊正春

原任湖北石首縣知縣行取丁未科進士張坦

潯江府河陽縣丁卯科舉人候選知縣刀衛

雲南府羅次縣儒學教諭卓薦戊午科舉人羅元琦

臨安府石屏州丁卯科舉人候選知縣任聚仁

臨安府石屏州丙子科舉人蔭光牙

石屏州志

姓氏

二

臨安府石屏州丙子科舉人候選知縣莫之先

大理府辛酉科舉人候選知縣楊濟

雲南府呈貢縣丙辰科舉人候選知縣孫似若

董理

臨安府石屏州吏目樊天濫

校對

石屏州儒學生員張金鑑

馬躍龍

許翌

羅慶恩

臨安府儒學生員李雲章

段騰

趙濂

督刊

石屏州儒學學廩生高玉章

臨安府儒學學廩生何唐采

石屏州志

姓氏

三

重修雲南臨安府石屏州志凡例

一屏志創始於前明蕭顧二公嗣江夏程石門重加編輯勒爲成書歷年已久今昔異致後有續卷首尾隔越每一披覽實有不全不備之憾今細加核定刪謬補缺義例謹嚴匪僅免穢亦期傳遠

一志先與圖職方所繫屏雖邊地亦號名區今依通志列之篇首庶一州形勢瞭如指掌

一舊志沿革先於天文地理似失倫次今遵通志改正至篇參井鬼諸家互爲抵牾擇其有徵驗者存之附以歲時氣候見石屏有與隣境差別者災祥並紀天象者人事之鑑

石屏州志 凡例

也勤民者留意焉

一屏境山川村寨舊志分載八里未免紛繁今依州城次第列之橋梁以便塗旅堰塘用資灌溉若民風土俗古蹟名勝均未可缺採入無遺

一沿革大事夏商而後不盡關一州者亦並志之庶因一州而全滇治忽之數得悉源委至

本朝制作度越百代紀載益加謹焉

一城池倉庫以奠民生哨舖關津以扼險要坊表所以闡揚懿德皆政事之大者不可缺也寺觀仍舊而已

一學校爲育才之地釋奠

先師厥典基重科目三途並載稽古之力堪垂榮名於不朽也

一滇南賦役不敵中州屏地彈丸其額尤簡我國家

聖聖相承恩綸疊沛軍屯減額荒蕪辭免總前後錫卹之異數而彙記之重

皇仁也

一秩官以重守土自州牧以至倅司皆得紀名姓以備參考其有與利剔弊功德在人者卽未盡列名宦亦爲紀其循績用昭直道

石屏州志 凡例

一禮以經國祀典宜重山川社稷祈穀報賽凡以和神人而迓天庥也其有功利一方歲時祭享者均考入焉祠廟

祀榮置不錄

一人物鄉賢以德業兼備者當之忠孝節烈名教攸關寧嚴勿濫其文學淵博醇雅爲儒林所推重者廣爲搜入亦仰體崇儒重道之意若者年封廕隱逸高士流寓異人并說偶談元宗風未墜者均採擇以備稽考焉

一藝文各有體裁今照通志以

御製冠首諸體以次編入爲擇其有關國計民生并可備法戒者若紳士家私自記述無從考其真贋者不敢槩入然猶苦其多以屏爲滇東人文地又未可從畧也詩歌則正葩

遺囑用傳諸體

一舊志不載兵防未免缺畧今另編於藝文之後亦有文事

必有武備之意

一父老傳聞野史雜記有難以分類編入者故以雜紀終焉

石屏州志

凡例

三

重修雲南臨安府石屏州志目錄

卷之一

輿圖志 州治總圖 屏舍圖 學宮圖 水利圖

天文志 分野 歲時 氣候 祥異 地理志 疆域 形勢 山川 險要 城舖 村寨 風俗 堪輿 橋梁 古蹟

卷之二

沿革志

建設志 官署 城池 倉庫 廟宇 學校志 文廟 學署 書院 考校 祭祀 樂器 貢士 武科 貢田 府

義學 貢田 府

石屏州志

目錄

卷之三

賦役志 戶口 稅糧 課差 積貯 官師志 知州 州同 州判 州吏目 教職

官師志 知州 州同 州判 州吏目 教職

卷之四

典禮志 祀典 祠壇 人物志 鄉賢 忠義 孝友 文學 封贈 廢襲 方伎 節孝 飲賓 人瑞 隱逸 流寓 仙釋

人物志 鄉賢 忠義 孝友 文學 封贈 廢襲 方伎 節孝 飲賓 人瑞 隱逸 流寓 仙釋

卷之五

藝文志 御製 奏疏

卷之六

藝文志二序傳說議狀碑墓表墓誌銘

卷之七

藝文志三

五言古 七言古 五言排律 七言排律
五言律 七言律 五言截 七言截 詩餘

卷之八

兵防志

靖叛 雜紀 旗途則

石屏州志

目錄

二

石屏州志卷之一

輿圖志

周禮大司徒掌建邦土地之圖周知九州地域廣輪之數
職方氏掌天下之圖辨其邦國都鄙荊刺率燕督亢圖蕭
何收關中國籍尤武拔圖以示鄧禹唐太宗於諸國朝貢
作王會圖趙充國之上方略鄭監門之繪流民皆圖也按
圖而稽雖百千萬里必無遁形矣我

國家統一寰宇遐邇向風疆域之廣遠過千古屏雖最爾而
界連五司壤接元昔亦邊徼要地扼險運籌一拔圖而瞻
若指掌也作輿圖志

石屏州志

卷一

輿圖

一

按輿圖載舊志有圖無說雖形勢瞭若指掌而道里之遠近
山川之險易漢夷之性情孰馴孰獷無由洞悉圖繪具陳
於籌邊奚裨茲特繫以說二一列之里仁里倚城而居
士敦禮讓民習商賈即離城處者不過四五里徵輸爲八
里倡無煩胥役追捕此屏民之最馴服者海東里由大水
迄海門山距城半日爲往府大道田土頗饒種植最先經
過者目其田畝咸稱樂壤應納租庸夙號爭先吳范里因
湖得名民多傍湖而處夷則捕魚漢則耕讀問其輪納亦
未嘗貽累公家交能里屬在城西去城不過十餘里壤土
饒沃相半樸者耕鑿秀者詩書風俗頗淳追徵易辨白邑